

道光遵義府志

遵義府志卷四十一

藝文一

詔敕

奏疏

地志之專載篇章自全蜀藝文志始而作者或以非
班氏例僅編目錄撮旨要其文章則緣事附入苟未
從附者則雖於山川風土利弊因革多藉以明而格
於膠鼓反致缺漏此楊氏之書所以稱立例最古也
遵義漢唐以來幾經顯晦其間鴻章鉅製可以聳耀
巖邦平視中原者正復不少今擷其菁華各歸體類
凡資攷鏡不別墨卿無關茲土要不濫及是又因地
制宜之一道不可盡以篁墩升菴相繩也至有紀事

之作直可註當事者亦卽繫之件下以便覽觀

詔敕

宋

真宗定土貢詔

景德四年閏五月戊辰

任土貢輸雖存舊典經途遐邇亦念重勞三司所定

劍隴等三十九州軍所貢土物並從蠲減夔賀等二

十七州軍悉罷所貢每歲正旦止具表以聞

王

曹旦知南平軍敕

蘇軾

敕供備庫副使曹旦西南瀘夷諸種部族散處叢篁谿谷之阻與魚鳥羣卉服而居畬田而食樂生惡死

情無甚異軍靡邊戍備預不虞靜而綏之彼自馴擾
往服吾訓以稱人知可特授依前官權知南平軍事

本集

元

世祖招集洞民詔

至元二十九
年正月丙辰

爰自前宋歸附十有餘年閱實戶數乃有司當知之

事諸郡皆然非獨爾播自今以往咸奠厥居流移失
所者招諭復業有司常加存恤毋致煩擾重困吾民

元史地
理志

武宗卽位大赦詔

昔我太祖皇帝以武功定天下世祖皇帝以文德治
海內列聖相承丕衍無疆之祚朕自先朝肅將天威
撫軍朔方殆將十年親御甲冑力戰卻敵者屢矣方
諸藩內附邊事以寧遽聞宮車晏駕廼有宗室諸王
貴戚元勳相與定策於和林咸以朕爲世祖曾孫之
嫡裕宗正派之傳以功以賢宜膺大寶朕謙讓未遑
至于再三還至上都宗親大臣復請于朕間者姦臣
乘隙謀爲不軌賴祖宗之靈母弟愛育黎拔力八達
稟命太后恭行天罰內難旣平神器不可久虛宗祧
不可乏祀合辭勸進誠意詣堅朕勉徇輿情于五月

二十一日卽皇帝位任大守重若沙冰淵屬嗣服之
云初其與民更始可大赦天下恤征戍甲士及供
給繁重州郡免上郡大都降興秋稅三年其餘路分
量重輕優免雲南八番田楊地免差發一年其積
年逋欠者蠲之逃移復業者免三年被災之處山場
湖泊課程權且停罷聽貧民採取站赤消乏者優之
經過軍馬勿得擾民諸處鐵冶諸人煽辦勉勵學
校蠲儒戶差役存問鰥寡孤獨

泰定帝改元詔

朕荷天鴻禧嗣大厯服側躬圖治夙夜祇畏惟祖訓

是遵乃開歲甲子景運伊始思與天下更新稽諸典禮踰年改元可以明年爲泰定元年免大都興和差稅三年八番思播兩廣洞寨差稅一年江淮朔科包銀三年四川雲南甘肅秋糧三分河南陝西遼陽縣鈔三分除虛增田稅免幹脫逋錢賑恤雲南廣海八番等處戍軍求直言賜高年帛禁獻山場湖泊之利

並元

明

太祖諭宣慰司牧

天生一代之君必成一代之治自古以來莫不皆然

而其間治有隆污政有得失亦由人君善用人與不善用人之所致也朕承大統之後矧今旣爲天子而肯私以怨惡加於人耶故用人盡忠於國者雖讐必賞朕仰遵成憲俯察輿情推至公之心廣仁厚之化嘉惠海內子育元元欲比隆前規以臻至治爾天下士官遵守朕訓各盡乃心毋妄懷疑以速咎戾則可以共保富貴於無窮

貴州通志

太祖賜羅琛勅

洪武五年二月

朕君天下凡四方慕義之士皆待之以禮授之以官使之宣其力焉爾羅琛係播州宣慰使司同知也比

若聞我聲教卽稱臣入貢朕用嘉之特加爾奉議大夫職銜茲仍立播州宣慰使司職命爾同知司事爾尙恪盡乃心謹守法度庶副朕委任之意焉可羅氏

奏議

元

論征西南夷事疏

大德六年

陳天祥

兵有不得已而不已者亦有不得已而不已者惟能得
已則已可使兵力永強以備不得已而不已之用是
之謂善用兵者也去歲行省右丞劉深遠征八百媳
婦國此乃不得已而不已之兵也彼苑裔小邦遠在雲
南之西南又數千里其地爲僻陋無用之地人皆頑
愚無知取之不足以爲利不取不足以爲害深欺上
罔下帥兵伐之經過八番縱橫自恣恃其威力虐害

居民中途變生所在皆叛深既不能制亂反爲亂衆所制軍中之糧人自相食計窮勢蹙倉黃退走士兵隨擊以致大敗深棄衆奔逃僅以身免喪兵十八九棄地千餘里朝廷再發陝西河南江西湖廣四省諸軍使劉二竊都總督以圖收復叛地湖北湖南大起丁夫運送軍糧至播州交納其正夫與擔負自己糧食者通計二十餘萬正當農時興此大役驅愁苦之人往廻千里中何事不有或所負之米盡到固爲幸矣然數萬之軍止仰今次一運之米自此以後又當如何比問西征敗卒及其將校頗知西南遠夷之

地重山複嶺陡澗深林竹木叢茂皆有長刺軍行徑
路在於其間窄處僅容一人一騎上如登天下如入
井賊若乘險邀擊我軍雖衆亦難施爲也又其毒霧
烟瘴之氣皆能傷人羣蠻旣知大軍將至若皆清野
遠遁阻其要害以老我師或進不得前旁無所掠士
卒饑餒疲死死亡將有不戰自困之勢不可不爲深
慮也且自征伐倭國占城交趾爪哇緬國以來近三
十年未嘗見有尺土一民內屬之蓋計其所費錢財
死損軍數可勝言哉去歲西征及今此舉亦復何異
前鑑不遠非難見也軍勞民擾未見休期只深一人

是其禍本又聞八番羅國之人向爲征西之軍優害
捐棄生業相繼逃叛怨深入於骨髓皆欲得其肉而
分食之人心皆惡天意亦憎惟須上承天意下順人
心早正深之罪續下明詔示彼一方以聖朝數十年
撫養之恩仍諭自今再無遠征之役以此招之
相續歸順之日使其官民上下皆知未須遠勞王師
與區區小醜爭一旦之勝負也昔大舜退師而苗民
格充國緩戰而羌衆安事載經傳爲萬世法爲今之
計宜且駐兵近境使其水路遠近得通或用鹽引茶
引或用實鈔多增米價和市軍糧但法令嚴明官不

失信可使米船蔽江而上軍自足食民亦不擾內安
根本外固邊陲以我之鎮靜御彼之猖狂布恩以柔
其心畜威以制其力期之以久漸次服之此王者之
師萬全之利也昔謂業已如此欲罷不能亦當慮其
關繫之大審詳成敗算定而行彼溪洞諸蠻各有種
類今之相聚者皆烏合之徒必無久能同心敵我之
理但急之則相救緩之則相疑以計使之互相讐怨
待彼有可乘之隙我有可動之時徐命諸軍數道俱
進服從者恩之以仁拒敵者威之以武恩威相濟功
乃易成若舍恩任威以蹈深之覆轍恐他日之患有

甚於今日也不報遂謝病去

元史

按此疏雖及播事而不盡關播若節之又首委不具覽者曹焉凡所載文詞相類者準此例

明

劾縱盜各官議川省善後疏

嘉靖四十四年

譚綸

臣謹奏據成都府申查得仁壽縣堂上櫃內原貯白銀被盜劫去等因臣將該縣知縣周大繡巡捕主簿李華責令戴罪拏賊所據失事官員通合查參以懲弗恪參照仁壽縣知縣周大繡本居令長不顧司存

銀已在庫而慢藏典守之心何怠賊得梯城而行劫防禦之術誠疏在平日雖有愛民之心於臨事殊無御盜之略人聊稍獲遺逸尙多巡捕主簿李華才本闖茸政亦怠弛伴食縣堂任其疲而弗練高臥私室致寇至而罔聞雖在履任之初難追曠官之咎此二者臣所當提問以爲奉職不恪者之戒也布政二司守巡川西二道左參政李尙智僉事呂廕均有地方之責難免疎虞之愆但李尙智則兼攝下川南道巡歷敘瀘未回相應免究呂廕則承委監督操務彼此顧慮難周相應量行罰治再照四川一省遠在西陲

山川險阻甲於天下法網疎闊自昔而然邇年以來
在外諸番跳梁雖屢行撫勦而桀驁之態尙轉相效
尤而恬不之改在內則武備廢弛卽嚴行督責而文
武之屬率視爲故事而莫覩其成如臣自入境以來
卽首視各郡縣城垣要皆單薄無益防禦甚如雲陽
等縣之城則倒塌殆盡僅存遺址推之通省大略類
是繼之簡閱軍伍尺籍徒存逃亡過半此則天下衛
所皆然而四川爲甚矣至民壯則論糧編丁最爲近
古其在今日可以循名責實轉弱爲強惟此而已奈
初意寢失於承平之久良法盡壞於不才之官有司

視役占爲當然以選練爲長物而先年又以採端之
故工費浩大稍議折徵以濟一時燃眉之急後以民
力告困暫行停減因循至今額數皆失而所存無幾
又皆白徒市棍遊手遊食責之披堅執銳以待暴客
其將能乎故自富順失事之後僅及年餘而越城劫
庫已經四起有由然哉又照全蜀四塞之地皆有盜
區而永寧播州二司尤爲淵藪蓋二司利羣盜之重
賂羣盜恃二司爲三窟出沒無常緝捕難及非一朝
一夕之故故先年議設分守參將一員於永寧官撫
司駐劄兼制播州一帶蓋欲其宣布威信鈐轄土夷

誠爲有見乃今反使羣盜得憑藉諸司以爲逋逃之
主而莫之誰何則又將焉用彼分守兼制爲哉其
蓋起於各官謀身之念太重任事之志弗專徒欲上
下雷同遷延歲月僥倖無事以保全其富貴而未加
顧名思義原始要終爲地方謀爲朝廷計耳則亦無
惑彼之桀獠愈甚轉相效尤而莫之改也至於參將
周表則又所難以備貢而當爲之處者蓋制馭土夷
之道在我當守其舊章在彼宜責以定分則我既有
執詞而彼亦自心服查得本路參將原係分守銅仁
後改爲思石兼制川湖播州等處向駐貴州石門

今復改駐播州兼制思石遂使該司上下同辭紛然
申擾以爲不便臣初嘗切責之比查前此當事諸臣
亦累行議處至久而未決蓋土夷每以激變上固爲
言周表亦以孤危難處爲慮臣因爲之熟計宣慰楊
氏之有播州已數十世爲轄八司土夷自常賦之外
朝廷未嘗令其妄出一錢而一旦以其素未嘗有之
官隨帶三省之兵改駐于其治內供應夫馬不免偏
累誠於情有弗堪故其心未帖服而周表此時且不
免委曲遷就以計定人心爲事不然恐生他故愈益
難處而又何暇問其藏汙納垢之事而畢得行吾志

哉故臣謂難以一概責備而又當爲之處者此也伏
乞敕下該部再加查議將知縣周大繡等行巡按御
史提問僉事呂廕量行罰治左參政李尚智免究仍
聽臣嚴督守巡兵備等道府衛所州縣等官將通省
大小城池竝行修濬務高深如法保障有資合用工
料從宜措處其原設民壯盡行查復舊額分投訓練
務成精兵以備不虞及通行永寧等處參將安大朝
并敘瀘重夔各兵備道嚴督播州宣慰楊烈永寧土
舍屠效忠等將竄入該司地方有名強盜盡拏獲解
臣正法仍禁戢所屬不許再行窩蔽其參將周表仍

聽該部轉行臣與貴州巡撫都御史從長計議改駐
適中地方免使獨累播州一司致生疑畏而文武庶
官中之有怠緩不職與土司中之有桀驁弗恭者皆
從臣遵照敕諭參拏處治甚則加之以兵如此則守
無不固令無不行而區區小寇不足慮矣 疏入帝

從之

明臣
奏議

平播疏

李化龍

楊酋匪茹與國爲仇萬姓荼毒三省震驚孰不以爲
不可以歲月克者乃自出師以來甫三月有奇而元
凶授首黨羽悉擒千年狼虎盤踞之窟一旦掃蕩無

遺上足以伸中國之威下足以洩生靈之憤其他狡黠土司獷悍惡苗無不落魄亡魂西南半壁天下可永無虞矣皇上德威遠被指授方略所致斷非文武將吏敢貪天功爲已力者惟是各官兵暴露行間勞苦萬狀不可不查敘也先是臣奉命入川賊知罪在不赦已統兵深入有擒王勦叛之說遂破綦江且逼重慶地方洶洶皆謂有長驅之志於時目前兵力略無可恃臣乃以計緩之一面調兵一面移文詰責若未嘗絕之者賊果信之卽具文求撫且不西向臣因得以徵調漢土諸兵急爲之備其持械氣張甚川人

畏如虎臣發成都兵甫出門欲投錦江不復肯東及
聞綦江守城兵見賊來競譟而走多投水者止餘二
將與其家丁遂及於難臣念漢兵心膽已碎土兵狐
兔有情自非招客兵不可因請調陝浙諸省之兵又
念外兵之費甚侈往來途次且生擾害不可過多乃
於每省鎮止調一二千多者三千共數省實僅僅二
萬其餘仍三省及滇粵土兵也然西南人見外兵來
莫測多少以爲天下之兵皆至矣自是漢兵之氣壯
而土兵之心亦折無不樂爲我用者時賊雖知調兵
然以爲虛聲嚇之如往日非實事也臣亦止在成都

積糧治器若無事者然不復東賊亦不疑北兵俱集
臣移駐重慶賊始知必勦頗肆衝突我兵漸益未
易得志也臣又念兵以一路進旣道狹不能容一有
前卻不可復振因分爲八路又念路分而兵少賊厚
其陣以衝之敗矣因命每路皆三萬以上每一路皆
可以當其全師又念關外賊黨多不可勝誅會兵部
頒賞格至首重招降臣亦推廣之但投戈者皆赦不
誅臣又念無賞士不勇往會兵部賞格首言得賊者
卽以家資與之臣亦推廣之克關破固各懸賞賞各
以千萬計旣川兵入關臣又恐其人自爲心若九節

度之師然因復委按察使張悌入總監之殺牲泣盟
務必得賊臣又恐賊事急詐降得以遷延至暑雨漸
深我兵不能久困令但急攻之有稱降者斬使焚書
無爲所紿時湖廣之兵亦至固下臣欲入營親監之
會聞先臣之訃臣恐營中遂懈情不可用因不待成
服跣而草檄示以例應候代照常督兵有慢令者尙
方具在令代中軍余德榮等再往監之臣又念賊固
後易攻固前難攻時諸將壁固下者各有分地因令
以勁兵一枝壁其前其餘并力於後臣又恐諸軍士
爭趨賊財物或至亂行至有他虞移文再四申禁臣

又聞營中流言水西目把尙不絕賊恐漏軍情因移文令其退劄水西土官懼撤其兵退而引嫌曰吾不欲爲亡播之續也時久雨軍士日在泥淖中至六月初四而天忽晴初五日遂破其二城初六日遂登其國賊以滅亡總計八路兵生擒賊首賊從一千一百二十四名斬級二萬二千六百八十七顆俘獲賊屬五千五百三十九名口招降播民一十二萬六千二百一十一名口全活被虜男婦一千六十四名口奪獲馬牛七百六十七匹獲器械四千四百四十四件是役也自賊破綦江至剿滅可一年自進兵至滅

賊百十有四日當八路對壘時土漢兵旣參差不齊
諸將領亦彼此觀望播人刦於賊之積威人自爲戰
未易卽克我各路又糧運艱難時有脫巾之呼臣曰
夜催督走使持檄至數百千卽兩省撫臣各路鎮道
亦靡不怠寢忘食或至頭鬚爲白總之諸文武知廟
堂之意必欲滅賊故鼓之卽應勞之不怨誅罰之亦
無敢囁嚅者倘更一月而賊不滅暑雨久瘴疫深我
將自潰無問賊矣該臣會同巡撫貴州郭子章巡撫
湖廣支可大巡撫偏沅江鐸議照國家方制萬里日
所出入之邦悉爲郡縣獨西南諸省不廢土司蓋亦

曰因俗而治與之相安云耳二百年來此輩犬羊之性不堪馴擾亦時有之然未有如播酋楊應龍之公然叛逆者則何也蓋其地險其兵強其才力足以使鬼通神其聲勢足以呼羣嘯黨加以年來方寓多事九伐之旌未遑南指彼遂時時狂逞亦遂時時得志井蛙之見謂縣官真無奈我何諸羣不逞如楊珠楊明何漢良孫時泰輩矚其雄心或時有以公孫躍馬尉佗自王之說進者賊亦自念騎虎勢不能下將曰等死耳無且舉大名乎於是恣其狂圖淫怒以逞而破城殺將鵲起西南之勢成矣夫天下非小弱也九

州四海兵非脆糧非乏也向賊逆未著皇上不忍遽
觀之兵曰吾且舞干吾且解網姑俟其悔過而與之
相安無事乃不謂兇人之性不移也始天怒赫然斷
在必剿夫斷而敢行鬼神避之況此么膺者乎蓋自
進剿之旨下上方之劍頒然後海內熊虎之師如雲
而集陳紅之粟蔽江而上智士陳謀勇夫効力火燎
毛山壓卵賊卽欲不灰飛烟滅亦曷可得已臣等嘗
卽諸路之功而評敘之在四川則楠木三峒賊黨以
爲三窟謂天險不可升者也婁山關賊前門我所必
由賊所必爭者也海龍囤賊以爲天造地設人跡所

不能到兵力所不能加者也三戰而克之賊力竭矣
不亡何待夫賊黨自戰其地猶易與也惟賊父子親
在行間諸賊人人致死難與爭鋒該路到處與賊父
子對壘最快者九盤子之戰賊悉其精銳以付朝棟
令之從綦江進從南川回此其目中尙復有官兵乎
劉綎一戰而走之自是播人爲之破膽尤快者諸軍
壁海龍固下連月不拔綎至一日而克其二城賊遂
滅亡至今羣口囂囂然竟無敢沒其先登之烈者兵
法無選鋒曰北綎於諸路其選鋒乎則綦江路之功
也臣嘗言破賊關外宜招降謂多不可勝誅也關內

宣疾戰謂師不可老也安村羅村陶洪三寨生口以
數萬計勝兵以數千計令貪功者以大兵初入必且
多殺以報捷勝之則傷仁不勝則損威矣而該路坐
受其降兵不血刃自是一戰而斬郭通緒再戰而入
巖門關三戰而屢捷於水牛塘賊計無復之遂父子
相哭而上固矣當其入水牛塘時川兵入關去國尙
遠湖貴兵在關外絕不相聞吳廣以孤軍去國數十
里而結營犯兵法之所忌而卒以得志自非其令嚴
而戰力當不及此後雖有講降悞事然有激而奮竟
以成功逆賊父子盡獲其首終不失爲全捷則永合

路之功也南川路最險最遠去國可六七百里賊以官兵必不能從此進當馬孔英之未至也高折枝以一書生請自將漢士兵以往此固已雄偉不常矣乃師期一月之前先擣官壩營以寒賊膽而撤回龍泉之兵且以解思石之危其事甚奇其功甚大比進兵從真州入真人則簞食壺漿以迎播人則棄甲曳兵而走居然有三代之氣象時諸將欲候各路消息方入關折枝毅然曰若是則誰爲當先入者策馬而前眾隨其後竟以三月初八日奪桑木關而據之臣用是以備各路尙有四月入者令諸將皆折枝諸將皆

南川滅賊當更速抵關而馬孔英至則文武相得如樂之和自是日日約各路攻圍有應有不應甚或以相誹詈而折枝不顧也分攻令下諸將爭走後門該路獨壁前門夫後門我易攻賊前門賊易衝我亦曰誰爲當賊衝者蓋亦先入關之意乎破圍之役後門以二路更攻前門以一路搏戰日夜揮戈人百其勇坐使賊自盡而逆黨無一逸者總之倡諸路之先作三軍之氣令黔師不得以賊強我弱借口而竟以奏功臣於該路文武蓋心折焉則南川路之功也在湖廣則偏橋一路江外爲四牌江內爲七牌皆五司遺

種九股惡苗盤據糾結乎其間四牌不一卽武一羣未易窺三渡也陳璘獨以一旅之師先掃四牌開我進兵之路用是烏江內賊黨寒心長坎瑪瑙青蛇三固自昔以爲險絕官兵所從未易得志者臣亦慮其難下令降之璘以爲除惡務盡竟以一鼓而升其巔殺戮數千臭聞十里時龍泉哨施南兵亦已先克板角關至今濱潭白泥之間四牌七牌之苗遂無遺種非璘之力不及此該路漢兵少土兵多糧運少遲便成噪呼璘令嚴而法肅卒能使之用命而不爲害迨至克關逼固議設木柵製鐵牌以防賊逸其機智

有足多者卒以入虎穴得虎子閩人綉女纍纍在俘
則偏橋路之功也貴州各路與川廣不同其地近其
兵少其餉乏其夷性反覆而靡常其民心搖惑而不
定茲之用兵又非以一淬勵一鼓舞之爲競者烏江
失律已見法矣然能借是以激厲水西俾之絕狐兔
之情踐虎狼之窟母氏國一戰大足褫逆酋之魄而
奪之氣此則失之武人得之文吏蓋運籌者之苦心
乎李應祥以孤危之兵當輓飈之時能自審於緩急
進止之間以守爲戰以招撫爲進攻卒之轉弱爲強
揚旌直指斬首數百招降數萬因破諸國斬三渡抵

白田何其壯也竟以連合川兵同心戮力破重城俘羣醜振積弱之邦舒華夏之氣始如處女繼如脫兔茲其審於機而神於用豈易得哉則平越烏江沙溪諸路之功也夫我國家從來用兵未有大得志於西南夷者國初傅友德統二十四將軍止言防守未聞戡定正統間麓川之役用兵五十萬轉餉半天下墜敘萬人三巡而罪人竟逸嘉靖初思田之役以剿始以撫終至今爲諸夷借口茲其大致可觀已諸帥庸眾人臣等三五書生耳其智略才力不及古人遠甚乃兵纔逾二十萬進兵纔逾百日費纔二百萬而

幸成功此非臣等之力皆由我皇上神武獨斷委任不疑用使文武同心將士効死爰有成績臣每誦詔旨卽十行之札萬里之外往往瞭於指掌而析於毫毛輒沾沾自得以爲賊平矣已戰勝於堂上矣夫淮蔡之平直須一斷何況聖朝廟謨洋洋若此哉

播地善後事宜疏

李化龍

查該州地隣三省然楚止偏橋路通一線蜀與黔蓋無所不接壤夫蜀無藉於播黔瘠壤也若乘此時而割播地以附黔則於蜀無損於黔有裨且臣等別疏又請以楚之四衛并割附之從此黔省幅幘得與十

二省比長絜大甚爲長便但盡屬之黔則地方千里諸凡締造勞費尙多亦黔所不能堪因議設爲二府分隸黔蜀庶建邦啓土各自經營成聚成都指顧可就皇上廓清之績旣已盡被於三藩而幷幪之仁又復再造於黔土矣除寬脅從撤兵馬招流移厚賑恤抑兼併靖橫恣等項凡明旨所叮哼而兵部所條議者俱已陸續舉行尙有後開款目謹集眾思列爲十二事呈覽

一復郡縣播州南極牂牁西連夔道漢唐收爲郡縣在川貴之間亦一都會也至唐乾符閒陷於南詔楊

端取而據之今逆酋旣平相應改土復流以變夷俗
及照播州白田壩沃壤數百里卽播州遵義縣故地
當復府治設縣附焉桐梓當綦南之衝走川貴道也
舊爲夜郎縣故地當復一縣望草南接婺思北達真
涪爲綏陽縣故地當復一縣仁懷濱播枕永襟合帶
瀘爲懷陽縣故地當復一縣真州卽古珍州川原平
衍商販周遊應復一州以上俱隸川省統轄黃平爲
川貴要區舊設撫苗通判一員列銜重慶駐鎮彼中
其與播勢相控馭竝爲重地應設一府湄潭龍泉地
里廣邈各應建設一縣夔水重安合設一縣餘慶白

泥合設一縣並草堂容山二司應割隸各縣以上地方去黔甚邇相應改隸貴州統轄總計增府二州一縣八蓋亂流初殄地闊人稀始建數城以爲繫屬以後地闊民聚無妨增設其二府治與附郭縣分正佐首領各應照例全設外州縣正佐首領俱應量減一設屯衛播州地方千里山川險惡夷漢雜居又逼鄰二大土司時有啓疆之志必須設官軍建屯衛以明居重馭輕之勢因設一衛於白田壩與府同城指揮使一員同知二員僉事二員鎮撫一員經歷一員知事一員所屬前後中左右五所每所正千戶一員

副千戶一員百戶四員所軍各一千共五千衛所官
於從征有功者酌量陞授不足者於鄰近願入者調
取移實之其邊隅通鄰土司地方各設屯田每軍照
祖制二十四畝再加六畝爲冬衣布花之費其三十
畝自種自食不必納糧於官又復領出紛紛滋弊各
開屯處除養屯軍之外餘田仍照民地起科上納本
折於各州縣爲衛官俸廩及不時軍興之用每年孟
冬仲冬孟春仲春農隙各屯官時加操練又以十月
二月望日齊赴兵備道大操三日驗其武藝較其強
弱而明賞罰焉老弱者汰之一屯老弱多者竝革其

官軍田卽另募壯丁補伍庶軍得實用異時卽募兵散盡此五千軍與主兵三千自有八千可用之兵矣一設兵備播地三面環夷干戈甫戢當此經綸草昧之始設立有司可以招撫流亡或未能長駕遠馭而圖久安布置將領可以備禦倉卒或易於生事微功而開邊釁欲以內修戎備外攝夷心整肅羣僚畏服衆志爲地方長久之計必設分巡兼兵備官一員於播州白田壩新建府城駐劄專一整飭新復郡縣并重慶衛忠黔二所永寧西陽石碛平邑等土司兵務兼理有司錢糧獄訟其重慶府巴縣綦江南川涪州

武隆彭水切鄰地方悉聽管轄以便行事黃平新設一府四縣雖割屬貴州但人心初附田土界連與貴州水西宣慰司并聽兼制

一設將領播淪於夷閱八百餘年風俗獷悍法令扞格已久今地雖蕩平而逋孽潛藏漢夷錯雜招苗樹黨越界侵田時所必有今議播州畱兵一萬黃平畱兵三千粗足防守然必得一大將鎮之始可無事查得先年克平九絲議畱總兵一員鎮守其地今建武視播稍緩卽一參遊足領之合無將軍門標下添設練兵遊擊一員改駐建武防守原設總兵移鎮播地

應畱各兵挑揀家丁三千買馬三百內標下標兵家
丁二千七百馬二百七十以坐營千把總領之兵道
員下家丁三百馬三十以中軍領之有事俱聽總兵
提調名爲正兵此外兵七千酌量分布於白田壩真
安桐梓等縣播川等邑防守內以一遊擊領三千以
二守備各領二千各用千把總分領之有事爭戰無
事卽爲築城鑿池建郡縣修郵驛之用糧銀照依舊
例支發徐俟建置竣工除家丁三千馬三百外餘
軍以次議撤有願附籍當軍及民當差者聽千把總
俱於附近衛所宮內選用其黃平兩兵三千仍設一

參將領之總聽防播總兵卽制

一丈田糧環播幅幘千里田地無慮數千萬畝舊時
額糧止歲以五千八百石輸貴州蓋蠻方賦稅原輕
至應龍巧立新法名曰等實每田一畝徵銀數錢初
猶斂其財以招苗後并奪其地以養苗而賦法蕩然
盡矣今旣改流自當責成道府親率州縣官定疆界
沿坵履畝逐一丈量分爲等則造冊呈報以定賦法
額糧輕重蜀無定規查克平九絲丈量田地分別上
中下三等每畝上田四升中田三升下田二升播地
山水間雜不止三等尙有上上下下者宜逐項分析

最上者一畝可當上田幾畝最下者幾畝可當下田一畝則待臨時酌定難以預計丈完總計田地若干糧若干徵本色若干折色若干俟二年之外起科除足一年夏秋二稅銀力二差一切雜費外餘解布政司充邊餉支用

一限田制播土舊民自逆酋倡亂大兵征討之餘僅存十之一二遺棄田地多無主人冊籍不存疆界莫考復業之民往往冒認影占原少報多原瘠報肥甚至一人占田一二千畝尙有異省流徙假播籍而希冒占者今應將播之舊民號楊保子者查果真的無

論原業肥瘠俱人給田三十畝上中下攬配均給若
一處皆上田皆下田者臨時酌給大率純下田多不
得過一百畝純上田不得少過二十畝其原非播民
凡不能爲楊保識者無問曾否寄住皆不得妄認遺
下無主民田另行招人承種納糧當差應龍宮庄竝
楊兆龍田一鵬何漢良等諸擒斬過有名頭人庄田
盡數沒官聽三省之民願占籍播州者承種其領田
之人查照時值量行上納以充目下建立城池衙門
驛傳諸費亦定爲限制平人不得過五十畝指揮千
百戶不得過百畝俱於丈量時定糧定價令不得那

移州縣官收過絕產價值給付印契登入循環聽兵
備道稽查轉報撫按查考官吏乾沒從重治罪

一設學校播故有學宋元之世俊茂朋興如冉從周
猶道明白鎮之流俱登進士蜚聲上國自逆龍禁錮
文字寇讐儒生坑儒燬書禍同秦始今干戈旣戢文
教宜先白田黃平舊有學宮補葺亦易應當於二府
原學各補教授一員訓導二員至博士弟子員無論
附郭外縣但入學使之選者蜀新四縣隸白田學黔
新四縣隸黃平學待各縣人文漸盛物力稍紓嗣各
立學未晚真安旣改爲流其地方殷富人物頗華亦

須建一學宮設一學正以示維新之化

一復驛站播州各驛自逆酋閉關負固驛官不敢赴任過客不敢經行站戶逃徙館舍坵墟十數年矣茲者地方底定道路大通驛站之設勢不容已查播州舊轄松坎桐梓播州永安湘川烏江昌田砂溪仁水湄潭鰲溪岑黃白泥一十三驛俱當川貴孔道所有各該驛館應趁時興工合用匠役亦於兵夫內查有慣造者徑撥不足者於附近州縣取用工食銀米計算於該邊支剩軍餉內動支仍責成新設府佐一員往來稽督不許虛冒錢糧曠廢時日事完冊報又查

各驛夫馬支應及官吏俸薪舊額土司供辦今既改
土設流似應與腹裡驛站一體僉派但流民授田方
始難便買馬行差目前一切站銀暫令官爲出辦俟
里甲稍定卽行編派至夫馬額數應照衝僻爲準湘
川驛附郭爲四路最衝應設馬四十匹夫八十名松
坎桐梓播川永安四驛地衝路險應各設馬三十四
夫五十名烏江仁水湄潭岑黃鰲溪白泥各驛俱次
衝應設馬各二十四夫各三十名昌田沙溪止通水
西次僻應設馬各十匹夫各二十名各驛官見在著
行令赴驛任事驛吏因屬土司舊未撥發今應行川

貴兩省布政司照缺查撥

一建城垣播州一府一州四縣與黃平一府四縣並
改築石城石少者以甄代之其兵備道總兵府州縣
衛州縣衙門公署倉廩庫獄城隍廟演武場與三府
一州儒學文廟殿廡齋舍等項俱當以次修舉而各
官一抵地方棲身爲急衙舍之建尤宜首圖各府州
縣正官選委勤敏佐貳於堪動銀內行支尅期興工
多方稽督大約城垣以歲辛丑二月內起工限年終
落成餘各以次備舉就中員役有怠惰冒破工力草
率者俱聽該道詳參究事竣之日造冊報撫按衙

門奏繳庶險要可資防禦有賴

一順夷情播州皆夷也大兵之後爲賊用力者芟夷
蘊崇已無遺種今見在者曰各司土官曰七姓秦氏
曰投降夷曰皆宜安插得所顧就中情事不同亦宜
分別如八司曰播州真州白泥餘慶草堂黃平重安
容山內安撫二長官六又一司甕水原無卽信亦稱
長官又有宣慰司同知羅氏此皆世有官號與播並
建者播州長官王積仁以附播被擒獻俘與楊氏俱
滅真州附播多年綦江之破助兵三百著在耳自同
知羅氏與江外五司具疏改流挑怨速禍至有今日

之事海內震動流血千里則諸司者罪之魁也故說
者謂真州宜正其附播之罪江外諸司宜以起釁絕
之第王道如天罰宜從輕賞宜從重真州當進兵之
初率先歸附正副長官各以千人從軍江外諸司各
招兵聚義充黔楚鄉導合將真州長官卽爲該州土
同知副長官卽爲土判官江外諸司安撫與正長官
卽爲該縣土縣丞副長官卽爲土主簿同知羅氏爲
新府土知事此外尙有投降夷目原非長官本無冠
帶但賞格曾坐名開諭輒爾先事歸誠亦宜少示眷
酌以明恩信如上赤水里頭目袁年父遭酷禍投降

最早宜授以所鎮撫職銜下赤水里頭目袁鑒仁懷里頭目王繼先安羅二村頭目羅國明羅國顯安鑾以上五名念其返誠歸正量授冠帶總旗諸人田產止將本身者照冊撥給應納稅糧通附州縣官處上納其餘里人俱令附籍納糧當差不許仍以家人爲名恣行霸占違者治其前罪至於七姓秦氏始助楊氏之惡繼傾楊氏之族尤爲禍首今蒙王仁寬宥外如仍蹈故習豪橫害民該道徑行拿問發落地方人民指稱前事告害者亦如之

一正疆域播地東北接連三省縣衛各有疆界無容

潞潯西南左接水西右逼永寧雖犬牙相攙未能齊
一然畫野分疆亦自有相沿界址惟是夷性互爲雄
長強則侵凌弱則減削甚至有一地而甲乙互臨一
人而齊楚兼事如儒溪沙溪水烟天旺皆播州五十
四里之數見有黃冊可考緝麻山李博埡仁懷石寶
甕平等處亦皆播州世業祇緣先年楊氏中衰時曾
爲永寧水西侵占後應龍當事治兵相攻恢復故業
各邊目又已任其糧馬兩下支持此在土司可略今
旣改土設流自宜各復其故乃水西止求清查永寧
輒行瀆擾且動以瓜分爲言罔上行私垂涎占業應

行該道會同隣近道分及早清查一切相隣地方原
係播者歸播原係永寧水西者歸奢安刻石立碑永
爲遵守其隣邊目把如不安分義妄肆爭侵重行究
治干礙土官一併叅處

此疏從四川志中採入敘播
中善後事最爲詳悉但前書

十二條後止列十一條且文勢尙未
收束疑有脫簡別無書可查姑仍之

貴州
通志

題設府州縣疏略

郭子章

播州之地東西相距二千餘里南北相距二百餘里
雖云愍國亦係樂土今議改流東西可設二府每府
各設二三縣播境原屬四川與貴州隣二省界限原
自分明至論建置大概臣意自沙溪以至白泥當以

烏江爲界設一府於白泥埧而真州萇山松坎等處
可爲三縣黃平在元已爲府矣當設一府於黃平或
平越而餘慶白泥二司可爲一縣甕水重安二司可
爲一縣此沙溪至白泥一帶建置之大概也自白泥
渡江至婺川縣以三渡板角苦竹三關爲界其中漢
苗田土雜錯惟湄潭可縣龍泉可縣龍泉土官安民
志陣亡其子尙幼其印已失土地已爲楊賊踐躪合
無將龍泉改建一縣增置城郭而以安民志之子世
爲土縣丞以爲死義者之勸其祖職長官世爲土主
簿此則思石一帶建置之大較也第播州之名其來

已久播之爲字番之有才者也以故應龍阻兵崛強
殲戾竭四方之力僅乃克之夫南越破而聞喜建呂
嘉得而獲嘉名龍州平改爲龍安九絲夷更名建武
卽播州納土於宋亦改名遵義計廟堂當有定謨而
播之名似當更易

蘭地善後機宜疏

天啓四年

朱燮元

臣謹題爲恭報蘭地情形與善後機宜仰祈聖裁以
期安攘事先是臣切責五路將吏逼進龍場擒僞掃
穴又慮僞黨懼死負固多方曉諭令其遵旨擒僞建
功贖罪去後隨據各路道將塘報官兵大至龍場齊

人得功有差降將胡世孝王繼宗等奉諭擒獲僞都督李遠達蔡金貴及奢崇明妻安氏等臣恐元兇未得老師匱財于是親抵戎行申嚴賞罰道經大洲江門永安永寧與詢問古藺落紅大壩新寨太平瀘衛一帶皆膏腴地也衛雖隸黔土實在蜀今二酋造逆奉旨征討臣與按臣并道將文武不惜軀命聚五路之師費三年之力以有今日雖二逆逃奔境外尙未獻俘而藺州疆界業已廓清矣蜀自遵義郡縣以來不以得土爲利翻以養兵爲累故談及改流輒多蹙額但二酋造逆滔天連年血戰僅而得之卽欲仍置

宣撫將與之誰人乎况永寧一塊土西自建武東至
遵義三面而環之賊欲動則無處不可闌出而我設
防則二千里之遙最難照應譬如人腹心肘腋之間
去一虎可復進一狼乎當聖祖時天造草昧西南苗
無不畏法故特就中設建衛所以通血脉徒用牙錯
之義殊少彈壓之威侵尋至于二逆肆惡橫行已無
天日在蜀以爲土司而寬其文網在黔以爲鄰苗而
置之不較陰謀旣久一旦驟發殺官戮民不啻刈草
此亙古未有之變也尙可因循苟且不爲長久計哉
以臣之愚參之衆論咸謂當以赤水河爲界自河以

東龍場一帶悉以與黔自河以西由赤水至永寧悉以還蜀就永寧城中設立道府與遵義建武互相倚角則呼吸相應聲勢聯絡用以彈壓諸苗保護內地計無善于此者若黔省以爲祖制不肯更張則照黎平鎮遠之例蜀自郡縣黔仍衛所雖曰駢枝亦無不可臣不敢侈開疆之名以滋多事但審地勢參人情似不得不出于此惟聽廟堂之公議皇上之酌裁耳至于二酋業已無黨無家人險遠遁或旦暮擒縛或遲以歲月通未可知惟黔蜀唇齒利害相依屢據該省撫臣移會應援臣已發參將林兆鼎提兵一萬殺

衝羿子猱獬等關直入大方該撫臣卽畱合營兵又
行令總鎮李維新撥籌事畢再發重兵應援外獨是
蜀連年用兵公私俱匱庫藏括而又括錢糧借而又
借小民之仇倚未復膏血盡罄不戢自焚最爲可慮
臣憂心如惓不能朝夕疆土旣清蚤宜確議一面設
法將各兵漸撤以省民力臣謹會同巡按四川監察
御史溫臯謨合詞上請伏乞皇上俯賜裁定勅部院
會集九卿科道從長確議覆請轉行臣等次第料理
奏報庶西南苗羿之地奠安十萬萬年矣爲此具本

謹題請旨

疏入帝從之

明臣奏議

簡兵屯守疏

天啓五年

朱燮元

臣謹題爲備陳協戰之難亟議固圉之策伏祈聖明
治臣不效之罪立賜褫放勅部速議良圖以無誤封
疆事臣行能淺劣濫荷重任適黔禍震鄰奉旨協援
屢接黔省督臣蔡復一手札移會春初舉事臣因各
兵調集一面檄各將本年正月二十六日誓師二月
十一日會兵大方一面移咨黔督去後至二十七日
遵義監軍僉事盧安世呈報到臣云黔省大兵已檄
正月十五日渡河奉黔督令二十七日會兵水西城
適該省參將許成名于二十日到府隨于二十二日

會兵進發等因臣遂飛檄永寧一路鎮道毋泥前期俱于正月三十日點發過河至二月初二日據盧僉事塘報副總林兆鼎率同侯良柱陳一龍等併黔中副將許成名會兵先發板山營胡斯化等攻破樂蒙沙溪巖孔一帶併力前進至二十三日于白蠟坎與賊對敵賊勢猖狂我兵出奇分三路包截將賊殺敗斬級三百六十三顆二十四日至八里水西賊追趕陸廣官兵甚急我兵接抵護出趙僉事并滇毛兵七八千等因又據大將李維新道臣謝澗許士奇劉可訓塘報副將秦衍祚同鄧懋官潘應奎孔全斌等前

進赤水一路初五日至層臺有馬兵殺手至海子大路來截各兵奮勇對敵斬級二十顆生擒五名俘獲男女一十五名口器械牛馬不計坐營劉宗良張洪烈郭起柱張令等前進龍場一路行至養馬司賊猶搗鼓渡河張令衝鋒右手重傷一箭追賊大敗共斬級三十餘顆溺水死者無算自是兩路賊俱深避不出捉獲黔省潰兵王佐等始知黔兵已退各將疑阻未敢遽進等因臣當檄各兵撤至赤水衛馬鈴堡兩處屯劄一面差人至黔省移問進止知該省路苗獫起未能再進臣思嚴兵待敵已匝一月賊雖遠避必

有狡謀該省業已暫停偏師未可深入隨于三月十
二日檄道將退還永寧減汰新調且耕且守聊固吾
圉獨是仰奉成命經營歲餘不能建尺寸之效以慰
皇上西顧之憂纓髮徒懸迢遙貽咎臣之罪于是無
可贖矣顧臣碌碌所處實難敢誦言而無諱可乎大
奢崇明父子雖未正藁街之戮然黨羽擒斬財用罄
乏獸奔鳥徙仰人鼻息所恨者安僑未受戎索甘爲
逋匿耳臣稔知安僑原非勁敵去歲犯黔普定三戰
而三大敗今歲犯遵義亦大敗夷之最驍雄無如魯
仲賢羅奇前歲犯古蘭一戰而擒斬厥後傾巢犯永

寧文一戰而宵奔官兵非畏之也祇是一入其界百
徑千歧旣佯退以誘我又扼險以邀我高山密箐倚
木皆巢深洞峭巖無處非窟重以陰雨晦蒙罕覩天
日雖有智勇未免張皇夫人能搏出山之虎而難逐
鋌險之鹿者形不利勢不便也今日用兵全爲三逆
卽殺賊數千百人而不得元兇何濟于事此一難也
兵旣深入夫運必不能前採野無獲伏莽難防無論
利鈍難知卽戰而勝黔滇不牽其前賊併力邀截必
犯情歸之忌此二難也據黔督移約令蜀兵東出遵
義西進畢節而黔專進陸廣是蜀環賊之三面而黔

獨處一又以水西城爲信地計黔省至陸廣爲程二
日由陸廣至水西城亦程二日蜀自瀘州至永寧爲
程四日自永寧至水西城爲程九日由遵義而進無
官程可稽然大約須六七日多寡遠近之數迥然懸
絕此又難之難也夫蜀民之困極矣馬已竭而猶求
鴻欲集而無所吸髓旣空揭竿欲起外則建昌松潘
羣夷在在跳梁內則屯戍各兵嗷嗷待哺畫地之餅
難啖無惠之法難振如臣庸闇實所不支昔馬援平
交廣狄青取崑崙皆越二三年而始得賊首當時未
聞隣酋有如安酋之肆虐亦未聞官兵直窮其所匿

也今日卽不言戰而言守遵義逼近曾穴曾豈念情
永寧赤水原非蜀衛奈地當全蜀之衝羣苗咸伺新
附未馴勢不得不守是蜀且新增二邊稍有疎虞難
遮竊發臣所爲日夜徬徨寢食靡寧者也顧臣不獨
爲蜀憂且爲黔憂蜀尙有民而黔已無民蜀尙能耕
而黔久不耕無民誰則爲兵無耕何由得食招募土
司徒滋騷擾之害遠候轉運更多劫掠之虞計日而
戰數米而炊前跋後蹙其苦更倍幸督臣蔡復一按
臣傳宗龍皆赤膽勁骨肆應有餘西南半壁自當廓
清但願皇上寬以歲月大發糧餉勿玩小醜而急撻

伐之功勿惜小費而掣任事之肘務令完固根本剪除支蔓足兵足食一舉而殲厥元兇卽蜀局且不勞而結此不兩得之勢也臣方草疏據僉事盧安世揭報督臣蔡復一將移鎮遵義此扼賊項背最得地宜伏乞敕下戶兵二部速議便宜推廣餉額專委任而責成功戰勝則已在廟堂矣臣庸碌病軀不稱厥職自審甚明不敢逃罪仰望聖明立議削黜俾存殘喘高厚洪恩銜戴其有極哉除畱兵需餉另疏陳乞外爲此具本謹題請旨 疏入帝從之

陳黔省情形用兵機宜疏

崇禎二年

朱燮元

臣自歷黔境乃知萬山皆苗獨上下六衛一綫通道
迤西畢烏赤永四衛久被僭隔計省城歸業者尙不
滿五百家敗址殘阡蕭條滿目祇有營哨各兵略爲
裝點該先任撫臣傅宗龍以洎前督臣張鶴鳴皆逐
衛設兵出據屯堡迄今滇路疏通米不騰貴實有攸
賴近日龍場六廣乾溝祥狼劄佐等處築城四座漸
進逼賊大勦規模似亦粗立但此戰局也城多則守
廣勢分則力微僭隔河立哨日夜耽耽譬則騎虎安
能復下曩所恃者安其爵欲得官而效順今被逆彥
逐入東川箐峒矣海子峒民共居僭腹心頗有牽制

今已淪陷矣入秋水涸曾必四出大犯此定勢也臣
惟八年以來局面屢換或專言勦而殺其獻功之人
益致狂逞或專言撫而未張撻伐之威曾亦不附今
日之策在于以守爲戰以戰寓撫專講致人之法嚴
爲先事之防將必求于摧鋒兵必期于用命爵秩太
易則精神全在競賞提哨太多則臨陣反相推諉業
已申明備爲訂定若壘陣紙兵謬居參贊之職白衣
遊食爭誇軒蓋之榮此皆軍中大蠹臣先從此輩破
情斥絕隨遍歷各隘觀其營壘移平就險改近據衝
日取各將士較其膂力多寡試其銃弩槍刀三試而

不申程者卽行汰革其地方最爲害者在于零星小
功緣各將坐耗廩餼無可搪塞有虛報賊級而殺順
苗以送驗者有一將已經撫定而一將乘隙掩殺者
有本來投順而詭稱設伏縛獻駢首就戮者夫環黔
皆苗安能盡殺御以威信總是良民况六衛腴土儘
多全賴此輩耕墾惟是殺不當罪事每失信遂致勾
夷生釁叛服不常臣三令而五申之逆則必勦毋縱
惡以養奸順則共撫毋此收而彼殺肘腋之間安靜
妥帖然後一意圖賊募耕墾以資粒食懸賞格以廣
招徠戮訛匿以定煩囂省差遣以絕需索清郵遞以

節虛費把兵精勇者悉收之降將有才者參用之任忠實之士司選屢勝之弩手用一將必求當一將之才養一兵必期得一兵之力日夜孜孜不敢怠遑按臣蘇琰與臣同心持火攻祕方親于公署督造試有奇效一切指麾風行雷厲司臣朱芹等道臣張允登等皆拮据勦勦不遺餘力倘糧餉獲敷三方畢會臣自當親率將士直搗長驅若其勢有可乘機難明布用奇迭出惟力是視固不敢孟浪以蹈前車亦不敢優游而稽天討蠹爾小僧伎倆有限安位一駭豎子夷漢相猜各自爭攻正苗運告終之日仰仗皇上威

靈一二年間或可滅此妖氛以少靖疆圉矣 疏入
帝從之

督黔善後事宜疏

崇禎四年

朱燮元

臣惟邊徼雖安不可忘戰制夷之法必先內固水西
自河以外六口九司之地亦頗廣衍業已悉入版圖
大渡要隘俱築建新城列兵據守既有扼項附背之
勢當爲深根固本之謀從來人士財用原自相因參
據衆議必須分建衛所責成有功各將久任世守不
惟鼓舞激勵用爲酬勸之資且因以勞來安集永杜
窺伺之漸請備陳之安僑地方中有河一條安莊與

普定適中之所爲三岔眾水至此始滙爲河織金臥
這等酋皆由此出犯臣于三年四月內牌行參將范
邦雄在地方鐵王旗築城一座距安莊九十里普定
六十里距河尙十五里建高寨一堡另設山京下窩
化處蔣義架底五哨以環之由鐵王旗迤北與平霸
衛相對爲思臘河係應察阿奎阿傀等各酋出犯之
路臣牌行遊擊金良田離平壩西三十里樂平地方
爲三路總隘建城一座移兵屯劄又都司僉書任先
覺率里民于七里房沿河築一石堡離樂平又四十
里由思臘而北爲簸箕隴又迤北十里爲鳴甸河又

迤北三十里爲鴈池河此則各酋會聚出入之大隘
與威清衛相對隔一百四十里崇禎二年六月臣與
御史蘇琰查此一路羣賊如毛先于距威清六十里
乾溝地方督副將楊正芳一面驅殺一面建造石城
以便駐師及後過河戰勝臣因與撫臣撤出各兵劄
于河上總兵林兆鼎率同楊正芳陳謙彭應魁袁可
成覃載勲等各將其于鴈池河岸上分定丈尺建城
一座都司僉書任先覺亦于簸箕隴建城一座皆上
據高原而下瞰長流卽一葦片刀無不瞭然者自鴈
池迤北三十里爲大索橋乃各賊暗渡之所已建一

石堡又迤北四十里則爲六廣此曾千百年通省官道也天啓六年該前任御史傅宗龍行副將今陞總兵官王國正建劄佐等處五小城又崇禎元年前任督臣張鶴鳴會同巡按御史陸獻明行本官建龍場大城一座題奉明旨命名敷勇臣履任後與御史蘇琰酌審地勢去河尙遠仍牌行王國正責成將官方國安劉鎮藩于六廣河岸建城一座又于迤北三十里虎場地方建城一座以防暗抄自此迤北三十里爲黃沙渡臣行袁桂芳于九莊地方築城一座距渡可十里又迤北六十里爲明家渡先是崇禎元年督

臣張鶴鳴行參將牟文綬建城一座題奉明旨命名
息烽臣閱其規制稍狹行參將牟文綬展拓功未竣
而奉調入衛臣行袁桂芳同守備牟海奇修築報竣
今年二月又于烏江渡口築一小堡過此河皆遶蜀
境矣以上各城如敷勇鐵王旗乾溝俱九里三分高
二丈鴨池息烽俱七里三分高一丈八尺六廣六里
三分高一丈六尺虎場九莊簸箕隴樂平劄佐俱三
里三分高俱一丈五尺內外用石包砌以上皆在僮
地控制河岸用以防邊者也貴州省城向苦湫窄居
民多在北關僮變將積聚盡焚以致大餒臣行王國

正楊正芳陳謙彭應魁張舜齡孫志學袁可成覃載
勳等共築新城一千丈添造三門廣順州無城向苦
賊害三年二月內行屯田都司孫志學定廣守備蔡
紹周署州事都事馬登崙新築石城一座洪邊開科
地方該河防道僉事沈翹楚親督築石城一座又安
南普安二衛地方該參政朱家民督率各將前後築
新城十一座此皆防盜竊發用以內固者也迤西四
衛除永寧衛城堞無恙畢節衛安酋代修其赤水衛
普市所摩泥站多被毀掘該道參政鄭朝棟會同總
兵許成名督各將從新修造用以聯滇蜀而馭夷通

商者也以上各城木因于箐石因于山採取扛擡則因之兵力惟木石二匠磚灰二甬頗費價值皆各將捐貲督兵拮据共効臣與按臣或助工費或犒工匠俱載部冊爲費頗省臣據各將報到工次恐其苟且搪塞于今年正月初八日自省出巡南至普安北至烏江遍歷查閱至二月十七日回省查驗所報俱符中有未建月城與丈尺稍不合者摘出修補今四月內陸續俱報到臣該臣看得城垣立則屯劄有區田土闢則粒食漸廣與酋相隔近則一河遠則不過數十里聲息易聞哨探聯絡若守之俾無失墜定無意

外惟是各將勞苦十年無不勃勃各懷出谷之思臣
惟久任屢煩明旨重地須用宿將近日兵部推用王
國正爲總兵不惟人地相宜且見功苦得酬將士暮
氣剴然一開此一鼓舞責成之大關鍵也所有各款
事宜具列于左一設建衛所查得通省新城如安普
十一座廣順開科等處皆係內地祇是整頓舊日營
哨因壘爲守不煩更置惟沿河自三岔起至于烏江
內如鳴池敷勇各宜設衛鐵王旗息烽各宜設一直
隸守禦千戶所敷勇則以六廣虎場九莊烏栗爲四
所割佐小索橋凹絞設爲三哨鳴池則以大索橋爲

箕隴乾溝樂平爲四所七百房安家橋麥城設爲三
哨鐵王旗則以山京下窩化處蔣義架底設爲五哨
息烽則以烏江明家渡落邦開科設爲四哨大小相
權如背使指無事荷鍤而耕有警一呼可應爲長久
計似無出此一久任世守查得沿河一帶向爲僑地
今俱各將戍守應增新缺除總兵王國正外如鴨池
副總兵楊正芳安莊副總兵商士傑鐵王旗參將范
邦雄六廣遊擊方國安初守六廣今調徉狼遊擊劉
鎮藩樂平遊擊金良田九莊部劄遊擊袁桂芳簸箕
隴僉書任先覺皆應責成久任內范邦雄應加副將

方國安劉鎮藩應加參將袁桂芳應與實授敷勇賜
池宜設指揮各三員千戶各六員百戶各十員鐵王
旗息烽宜設指揮各三員千戶各四員百戶各六員
擇其勞久功多且專任版築之役者容臣酌議敘題
世守再照九司尙存其三如養龍司土官蔡啓東底
寨司土官蔡應吉乖西司土官楊光綬家口俱被殺
擄或無助逆實跡應照播州袁初袁切事例改爲世
職副千戶附入息烽其產悉聽照舊管業庶省此贅
疣且便控制一監臨提調衛所旣建將士碁布則勢
易相畸而力亦易分如總兵官王國正整飭沿河一

帶奉有明旨除責成駐劄龍場時時巡歷經理外中間統馭查覈必藉監司如沿河巡視兼理屯田此河防道責任然官係添設未必久任如鴟池鐵王旗一路應隸威清安平二道敷勇息烽應隸貴寧畢節則貴陽府爲提調各有界限庶便責成一官俸兵食衛所旣設土地亦闢添官必資俸廩設戍必需口糧相應卽以地之所出收取爲用今計沿河一帶地儘廣衍惟是各將士從去歲至今甫息水西之役又有狼峒擺金火烘兩江之役未遑開墾近日又抽援滇省故未能一一清楚大約二衛二所安定之後祇可用

兵萬人計舊例一軍授水田十二畝旱地六畝今應照二祖成例量寬之俾足自贍其各官俸廩亦就中取足近日現兵除下六衛省城并安南普安二衛外沿河一帶幾及二萬自此地可漸闢兵可漸裁今方寓戰于耕後可卽兵爲農其田現在清丈地方豪彊侵占影射負固不明者容臣一一以法懲之一更易新名二衛二所之地經臣親閱二遍公署街市雖云草創亦可棲止街市團集多者千餘少者亦有數百家生聚日久自當改觀如敷勇息烽于襄連雲有嘉靜氛恬波奏膚俱蒙欽命新名今如鴨池鐵王旗樂

平乾溝簸箕隴六廣九莊虎場開科鼎站阿機尾灑
定頭小龍場亦資孔乞請皇上俱賜新名改易耳目
一振僻陋其二衛應設經歷各一員二所應設吏目
各一員臣已行各將俱草創一署合敕吏部選授以
上各款俱因陋就簡草立規制臣疎庸闇陋多有茫
昧統祈敕下兵部酌議覆奉明旨容臣遵奉施行謹
題 疏入帝從之

陳黔蜀連界扼要情形疏

崇禎四年

朱燮元

臣謹奏竊照黔之迤西四衛曰畢節曰赤水曰烏撒
曰永寧永寧衛與蜀之永寧宣撫司連界犬牙相錯

向來彼此相安未有爭者自奢酋作難先將黔之弁紳士民恣行屠戮然後四出犯蜀其幸脫者或入菁峒或被掠賣或逃入烏蒙鎮雄十年以來不見天日今幸事寧稍稍還集流離瑣尾之狀有不忍見者夫哀鳴日久誰無安宅之思忝離可悲宜與生全之計顧此衛爲黔蜀合縫之區若事不兩利情不交暢則措處失宜紛構環起非大公之道長久之術也總惟照祖制以清界限酌近勢以定規畫俾協于情而當于法則彼此自可相安而地方庶可鞏固臣不揣愚暗謬列五款于左統冀聖裁一黔蜀界址查黔之永

寧衛設自洪武四年屯田五萬三千二百九十畝其餘皆爲四川永寧宣撫司之地舊制宣撫司城垣衙署原在城外後因宣撫梗法生事議遷城內以便彈壓自是宣撫司各夷與蜀人多相雜而居今黔蜀紛紜互爭甚至假威權以恣虐嗟此才遺多有不保生命者近閱邸報吏部已陞有永赤同知蔣之芳合責成本官到衛臣移會蜀中撫臣委府佐一員查舊日街巷自辛酉以前爲率喚集父老將街地逐一踏勘某爲黔某爲蜀某爲宣撫司各查出原址周圍丈尺取各認狀是黔還黔是蜀還蜀則公道昭而人心自

服矣一蜀鎮駐劄蜀之幅員最廣設立總鎮原無定所惟地方用兵隨處屯兵劄駐如松潘越雋遵義建武皆有舊駐衙署今奢賊旣殲水西就撫西則普市摩泥赤水南則瀘衛建武交錯相環永寧一塊土反在腹裏查此衛係黔省按臣出巡察攷與提學道臣攷試駐劄之所今此彈丸地武士若林布滿街巷黔之軍衛士民曾不得聚廬而託足焉夫以全蜀之大決不宜駐總鎮于黔衛查自永寧至瀘衛五十里由瀘衛至建武九十里相距頗近論形勢則建武扼控諸蠻最爲要害舊有衙署亟宜移駐卽不然則瀘州

衛或城外宣撫司舊基皆可駐鎮惟將此一衛仍歸黔轄庶疆界明白而流移獲返此似不待再計者也一川貴參將查永寧衛原設迤西參將一員統束衛所各軍以資守禦及後改爲川貴參將兩員交轄除黔用衛所各軍外蜀以鎮遠營兵輪番撥防奢賊發難時參將久缺新推萬全尙未履任以致縱橫無忌今川貴參將武聲華反移駐瀘州衛舊制盡失且黔中衛所各軍分屯歸伍誰爲管束相應仍照舊制移駐該衛督修屯政嚴行操練兼飭蜀中防兵以修武事庶幾事有專責勢可兩利也一四川敘馬瀘道駐

劄蓋四川之有敘馬瀘兵備副使原用以整飭兵防
保固邊境兼制鎮雄烏蒙烏撒東川四土府責任綦
重守道已駐敘府巡道已駐瀘州獨敘瀘兵備向駐
長寧縣今復移駐敘城相距建武永寧爲期五六日
最屬不便曩者永寧宣撫司棄爲外夷蔑有彈壓以
致尾大不掉今藺土內外旣入蜀之職方自應就近
統理合將敘瀘道署移入蜀之寧衛宣撫舊基之內
其于建武瀘衛相距不遠旣便飭兵蒐乘兼可鎮夷
消萌似爲妥便夫總鎮則議移而兵道則議入者蓋
文臣法紀清肅隨從稀少軍民咸有依戴彼此自可

相安也一宣撫司內外四里昔年攻入永寧奢賊父子遁走時臣未經履畝審據降目并蜀人習蘭事者俱云奢賊地有內外四里外四里地多平原與江安納谿瀘州合江仁懷壤界相接向來俱蜀人佃種照額輸租其內四里與水西接壤多荒山險阨惟古藺州稍有腴土俱係各目分管奢賊責令輪當驛馬蜀人曾未有至者是時餘孽未靖兵革方興臣因其舊習以外四里開屯贍兵以內四里分給降將參據眾議謂有三善藩籬要害人自爲守一也兵部題奉明旨賞格頗侈借土酬功不煩另資二也効忠者卽給

土授官俾諸夷各把目後具有榜樣三也各將如羅
乾象仗義解圍擒斬魯仲賢等甚至賊當陣斃其妻
子而不顧羅京周殺逆寅于險籌胡汝高先赴義于
成都又畢應台鄢介王心一羅甫宋武張令等聽劉
養鯤之招仗義擒兇其出死力皆懸望酬賞以彰大
信今准四川撫臣張論移會疏藁深籌熟算欲建長
官司俾令世守業有確論其經理創始臣實首事不
得不述其概至于近日時異勢殊道鎮持議或有異
同又當隨時斟酌務求長便臣已在局外合應專聽
四川撫臣與按臣酌量處分必以臣議爲據也以

上各款統祈敕下兵部酌議覆奉明旨行臣并四川撫按二臣遵奉施行謹題 疏入帝從之並同

請速靖水蘭疏

余文燜

題爲水蘭渠魁就戮西南定局已成宜慎勦洗之略以速安攘之效事臣乞身歸省跼伏田間者四年餘日聞彥賊負隅狂逞而逋寇奢崇明爪牙之先事者苦於虎穴難探每謂餉不足兵不多曠日縣歲老師費財民膏日竭而賊焰日張岌岌乎莫知所終矣幸督撫按臣新授方略道臣劉可訓鎮臣侯良桂以一旅之師破賊十餘萬眾直如拉朽摧枯豈專師武臣

之力仰賴皇上威德遐邇莫不震疊故兩臣身先士卒背水決戰直以忠義之氣勝之耳元兇大憝殺戮幾盡倘寬脅從之誅西南半壁已可從而底定矣廟謨宏遠將欲勦洗以盡殲之拓土開疆此最勝之烈也惟是駭鹿易逐而狡兔多窟土夷烏合實繁有徒嘗見貴州解圍之後賊無堅壘直搗大方當時倘加持重豈至自棄前功懲前愆後必須先事詳計謀出萬全以畢此不常有之奇勲所當慎者一也功名之地人所欲居軍氣方揚易於輕敵而功高取忌則挑釁養寇逗遛以自圖者又未必無之嘗見三路進兵

期會牽制勦撫異地庚癸爭呼幾同聚訟若非賊寇
門庭適鎮獨當一面誰爲出奇制勝故必協力同心
呼吸相應將伯必可助予因人不妨成事前茅後勁
殺賊招降總屬廓清勿致見分爾我築舍道旁失此
不再得之機會所當慎者二也水外膏腴已無難收
入版籍進之深林密箐陵谷險阻攻取爲難城守不
易嘗見邇義郡縣其地近者三十年則壤所賦幾何
有無補於公家而城郭宮室官僚守衛之費先已不
貲安在廣地之不荒而遠略之足勤也鬼方僻壤力
爭諸原得將安用當先有控馭成畫以厝置之勿徒

疲腹裏以事荒服而竟委此血戰之功於草莽所當
慎者三也西南用兵九年兵戈所駐荆棘生焉諸所
經過室廬荒廢萬竈寒烟蕭條滿目今幸大捷正哀
鴻集澤之曰矣兵貴拙速不尙巧遲速則乘機巧則
生變况亡僭傷夷之餘躡以大軍有何堅陣卽當尅
期蕩平甦此轉輸之才遺勿使遺孽復安又生多事
倘或尙須斟酌亦當蚤爲請命罪在可原者待以不
死使知雷霆自擊天地自寬戰勝之師寧戢而不騁
以安反側前之勁敵功在攻荒後之窮寇功又在收
服勿但貪功妄殺零碎報捷致時可削平仍賣劍買

犢之無期窮兵黠武自焚可虞干羽兩階豈曰虛語
庶楚蜀滇黔每歲百萬之金錢不至長付之逝波也
慎以相機速以結局安危難易晷刻是爭審時度勢
西南安攘之急著似不出此

保蜀援黔疏

倪斯蕙

爲蜀局將結黔事再壞勢必借蜀援黔究且因黔憊
蜀情自切於同室計必盡於萬全敬抒一得以佐末
議以保西南半壁事蓋今中外知邊事之爲急不知
黔事之爲急也知黔事不知黔事卽爲蜀事也惟借
蜀而後可以援黔惟保黔而後可以安蜀黔一日未

得了局蜀一日未得息肩是黔蜀竟相終始天下安危實繫於此臣蜀人也生長重慶奢僭之變酷罹其禍三疏叫闕報變善後請餉詳具列款荷蒙聖恩俞允下部議覆多所採擇謂宜數月之間即可蕩平不虞淹至四年師益老財益匱人心益惴惴不安而黔師又報潰矣臣自己酉得請假養親比今十七年矣辛酉二月蒙恩起補原官尋值奢僭之變本省按臣題臣蒙難不屈伏荷聖旨憫臣家難奉部檄催臣上任屬臣父驚悸成病出城四閱月物故至去冬十月始服闋會黔又以敗聞臣在梓里聞見最真恨不

插翼飛入春明一爲皇上紓此西顧憂行至河南地
方偶感風寒延淇縣醫李尙文調治尙無起色萬一
臣疾未瘳溘焉朝露則臣之一念杞憂藿謀終未得
盡吐於皇上也因不避愚誠敢再披瀝蓋自奢僭煽
亂全蜀震動仰仗皇上威靈督撫按道諸臣相機戰
守設奇制勝亦旣解成都復重慶收四十七郡縣恢
復永寧掃蕩蘭州纍纍獻俘闕廷絜玉壘金蹕之舊
還之陛下蜀事儘已了局蜀人從此安枕謂宜乘勝
席捲一掃欃槍乃奢僭尙魚遊於釜底安賊猶虎峙
於牂牁芒部鎮雄諸夷且欲窺漁利於螭蚌奢僭安

爲負隅安以奢爲奇貨紐合一團結成三窟我師進則彼故退以誘我之入我師退則彼故進以躡我之後我師不進不退彼故兩持觀望以老我之師彼爲其主我爲其客彼以逸待勞我以勞就逸彼合一心以禦我我分兩省以禦彼况巖洞箐林旣難長驅直搗而重趼不毛千里餽餉又三十鍾不能致一石荷戈者難於枵腹當事者勇於成功往往輒墮賊計自取衄亾以朝廷數百萬金錢全省數百萬民命止供眾兵一走非葬魚腹則填虎口令賈生在當何如痛哭流涕焉臣竊謂此一事也變之方起似難而或易

及事之既久似易而實難蓋彼時賊勢方張人心奮
勇切不共戴天之仇有封狼居胥之意恨不賈勇登
先滅此朝食如人之初病六脈俱沈疾勢正劇人子
急於求醫術士療治恐後比今病已休囚人臥牀簀
人子之心已竭醫家之術漸窮雖有俞跗倉公其將
何以措手耶且蜀自奢酋之後大半消耗氣息奄奄
旁有臥病呻吟者不忍坐視復欲策杖力疾往拯
人未拯而我益病此兩斃之道也在蜀以援黔而兼
討賊在黔以殲水而兼驅蘭必欲拯黔當先固蜀必
欲固蜀當重爲黔計昔我太祖高皇帝之征東川救

諭傳友德曰東川芒部水西諸夷聚夥無事則互爭
有事則相援昔閣羅鳳亾居大理唐兵追捕道出夷
地聚集凶醜偶以不備喪師又曰夷地險峻崎嶇大
將一至竄入林藪猝難捕獲宜駐兵屯種待以歲月
而後可圖煌煌王言非蜀事之明鑑哉今內帑旣不
敢頻請民間又不能再派惟有太祖屯糧之法在然
事無專責終屬築舍或特屬一道專管屯田而地方
遼闊難以逐一履畝各府原設有軍屯同知應擇任
廉能二員畫地而田計畝而耕土民降夷一體分授
庶無事則守有事則戰久之屯農漸慣習戰則防兵

亦可漸撤趙充國之困先零計不越此則屯田之設不可不講也又考太祖皇帝之征建昌也藍玉奏四川地曠山險控扼西番蠻夷梗化欲多置軍衛籍民爲軍上曰連年供輸煩擾兵久在外不宜重勞但養銳蓄威徐議後舉夫以太祖之神武國初之物力傅藍諸將之驍傑猶斤斤其慎如此兵法萬里而趨利者蹶上將今日之事豈宜輕試深入再蹈覆轍哉只宜行閒諸苗以攜其黨厚積戎餉以待其困多方縶繆以固其圉如太祖所謂徐議後舉者是也況敗師之後神氣便難猝振大兵便難驟集必須需以日月

待以鎮靜發以沈毅而後萬舉萬當一戰卽捷則進
兵不可不慎也漢臣諸葛亮初平蜀南曰若畱外人
則當畱兵兵畱則無所食一不易也蠻初傷破父兄
死喪畱外人而無兵則必貽患二不易也蠻屢有廢
殺之罪自嫌釁重若畱外人終不相信三不易也今
吾欲使不畱兵不運餉而綱紀粗安有味乎漢臣之
言其今日平蜀之第一義乎業已復永寧收蘭州則
此一塊土作何防守作何安插則區畫不可不周也
昔播事之初七姓交攻有內叛而無外援今水蘭之
變各夷糾結有外援而無內叛計非設閒懸賞便難

遽得要領督臣苦心區畫數年於此具有成效信賞必罰惟在朝廷誥申飭之諸土司有能擒安奢二酋以獻者卽以其土地與之若中懷觀望尙持兩可有罪無赦則賞罰不可不信也蜀兵所稱慄悍勦卒惟南岸白桿子耳乃南岸之兵原不滿萬今日招去而逃明日逃回而招總之此兵往還道路希冒糧餉甚之游手匹命之徒手不能挽弓身不能擐甲虛冒南岸補充兵數每見管兵之官經過渝城臨時招募或雇倩應點隨卽散去見賊而逃者皆此輩也則兵之真偽數之虛實不可不覈也孫吳將兵卽婦人宮嬪

皆可爲戰如依臣曩疏責成有司處處團練鄉兵人
可爲兵家可爲壘比今四年之久卽未能摧鋒陷陣
亦可扼要守陴乃一聞報警遂招募兵旣挾驕蹇以
微重餉又恣咆哮以噬道路地方豈乏兵特訓之無
人練之無法以故往往仰給於土司耳如敘州瀘合
遵桐綦江各官設兵防守誠申飭鄉兵卽以此爲有
司鍛最不惟可以防奢僧之逸亦可以折驕兵之氣
而壯地方之膽則鄉兵不可不練也臣尤有請者往
卽銓部時其時河工正亟地方官員皆駐停推升至
今猶記之昔官重久任謂不宜以迎送頻頻擾累百

姓况今殘破之後坐未煖席事無成績又以他徙去
接管不一推諉易生何以專責成而奏成功乎謂宜
仿昔年治河例一切俱停推升以待平蠻後按功升
擢破以常調卽開府京堂亦不愛焉庶事有責成官
無卸擔而何難殲此蠻類則久任之責不可不議也
此內外諸臣或言之已悉豈敢再勦陳言輒瀆天聽
惟是傷弓之鳥計切維桑乃鳴不擇音之時也顧方
伏枕旅次日理藥裏若待臣人奏痊可無期故敢輒
爲臚列如以臣言不謬伏惟聖明俞允下部採擇施
行地方幸甚奉聖旨黔師再挫協勦宜亟但兵弱餉

之委難輕進地方官有能屯種養銳設閒懸賞團練
鄉兵俟事平之後一體超擢以後但係黔蜀賢能官
員任滿都著加銜管事不得含糊升遷該部知道

通志